



Komunikadu Imprensa

Periodu : Feveiru 2011

Publikasaun : 23 Feveiru 2011

JSMP Realiza Treinamentu Iha Suco Cassa, Distritu Ainaru

Iha loron 14 fulan Feveiru 2011, *Judicial System Monitoring Programme* (JSMP) liu husi Unidade Apoiu Legal ba Vítima (*Victim Support Service*) ka VSS, realiza programa treinamentu ba autoridade komunitária, hanesan Xefe Suco, Xefe Aldeia, Konsellu Suco, Rede Feto, representante joventude mane no feto autoridade komunitária, nomos komunidadade balun iha Suco refere. Partisipante sira ne'e hamutuk ema tolu nulu resin lima (35), kompostu husi mane rua nulu resin ida (21) no feto ema nain sanulu resin haat (14).

Matéria ne'ebé JSMP/VSS fó iha treinamentu ne'e konabá Kódigu Penál no Kódigu Prosesu Penál husi perspektiva vítima violénsia bazeia ba jéneru; Konstituisaun RDTL liu-liu artigu ne'ebé defini konabá prinsipu estadu direitu, igualdade jeneru, no lei espesial Nu. 7/2010 konabá Lei Kontra Violénsia Doméstika, no prinsipiu balun husi Konvensaun Internasional konabá Halakon Forma Diskriminasaun hotu-hotu Hasoru Feto (CEDAW) no Konvensaun konabá Direitu Labarik nian.

Aleinde ne'e, treinamentu ne'e mos kobre artigu balun husi Lei no. 3/2009 konabá Lideransa Komunitária, ne'ebé defini mós kompetensia Xefe Suco no Konsellu Suco konabá promove hari mekanismu atu hamenus siklus violénsia doméstika, inklui mós knaar ka funsaun husi Ajente Prosesual no autoridade judisaria. Iha oportunidade ne'e, JSMP/VSS esprika mós ba partisipante sira konabá prosesu ba kazu krime no kazu sivil tuir sistema justisa formal iha Timor Leste.

JSMP nia hanoin katak, treinamentu ida ne'e realiza iha Suco refere ho objetivu atu hasa'e kuiñesimentu lider komunitária, grupu feto, representante joventude feto no mane, inklui komunidadade konabá prosedimentu sistema justisa formal iha Timór Lésté, liu-liu oinsa bele hamenus siklus violénsia bazeia ba jéneru.

Tuir JSMP ninia observaun ba komunidadade iha Suco refere hare katak, maske Lei Kontra Violénsia Doméstika nia natureza krime públiku maibé iha realidade ba moris komunidadade nia kuiñesimentu sei minimu ba lei ne'e rasik. Tanbá tuir lider komunitária sira nia hanoin katak, kuandu violénsia doméstika ne'ebé la grave no

vítima rasik hakarak atu rezolve familia, dala barak mós kazu hirak ne'e rezolve deit iha nivel familia. Razaun hirak ne'e komidade iha Suco refere hato'o ba JSMP tanbá esperiensa ne'ebé komidade hasoru katak atu prosesu kazu tuir sistema justisa formal han tempu barak liu no presiza orsamentu boot durante iha prosesu nia laran.

Difikuldade hirak ne'e maka dala barak komidade iha Suco refere, dala barak liu rezolve kazu violénsia doméstika liu husi sistema kultura/adat. Maibé liu husi treinamentu ne'e, lider komunitária sira mós hamutuk ho komidade komesa hatene dadauk ona konabá prosesu ba kazu violénsia doméstika ne'ebé kobre violénsia fízika, psikolojika, seksual, no violénsia ekonomika. Iha parte seluk mós bele hamenus kazu violénsia doméstika iha ita nia komidade nia le'et hodi hari'i ambiente paz no hakmatek iha ita ida-idak nia moris nu'udar sidadaun ne'ebé respeitu ba dignidade umanu no prinsipiu Estadu Direitu no iguldade jeneru.

Treinamentu ne'e realiza atraveza husi apoiu finaseiru husi Governu Autralia liu husi Justice Facility.

Atu hetan infórmasaun kle'an favor kontaktu:

Luis de Oliveira Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883